

qualitatum intensionem ad formam viuentis, & nondum alia pars materiae est disposita, in qua non potest acquirere formam viuentis, neque praesistentem conseruare, quia ad illam conseruandam caret dispositionibus requisitis. Neque valet dicere, quod forma ad paruū tempus potest sine proprijs dispositionibus conseruari, nam forma substantialis aequae est dependens, vel independens a dispositionibus in omni tempore, & quodlibet temporis instanti; quapropter si posset in vno instanti sine debitis dispositionibus conseruari; ergo in omni.

50. Obijcies 3. si materia prima daretur, & esset sine forma, existens naturaliter, ipsa met materia esset, & nō esset substantia; at hoc implicat; ergo implicaret etiam, quod si materia daretur absque vlla forma substantiali existeret. probatur maior ab aduersarijs, ex eo quod esse substantiale habetur totum a forma.

Respondeo, nego maiorem; ad probationem eius dico falsū esse, quod totum esse substantiale dependeat a forma, quia forma, vt forma substantialis est, educitur de materia, quod fieri non posset si materia ex se substantia non esset, & entitas, quae esset sui iuris, vt pluries in antecedenti demonstraui.

51. Obijcies 4. materia prima, si daretur, deberet esse sub determinata specie; sed sine forma hoc habere non posset; ergo nec sine illa, existere posset.

Respondeo, concedo maiorem, nego minorem, & consequentiam; iam enim huic argumento responsum fuit supra subiecto antecedenti n. 27. videlicet quod non est materia prima, quae ponitur in specie determinata a forma, sed totum compositū, nam materia prima, si daretur, per se ipsam poneretur in specie determinata distincta a forma, sicut forma ponit seipsam in specie distincta a materia, videlicet vna per esse perfectibile, & alia per perfectiuum; potentia namque physica includens actum entitatum potest existere sine forma, & ab eadem, vt ab actu formali, specie distinguitur. Concludo ergo, quod si daretur materia prima in natura, & forma substantialis aristotelica, illa posset naturaliter existere, & conseruari sine ista.